

1538
cipitem certaminis aleam dare noluiſſet. Neque a probris in illum congerendis Hiſpani abſtinebant, Anguillario Cæſaris legato Romæ, quæ ab Auria acta fuerant, improbante, atque acerrime fugillante. His rumoribus, ac vocibus adeo acerbe jactatis ita animo angebatur, atque incredibili mœrore conficiebatur, ut Corcyram reverſus, raro in publicum prodiret, & cum de Adriaco eventu ſermo coram illo haberetur, ſera fortasſe pœnitentia adductus, vix lachrimas cohiberet. Conſtat, Ferdinandum Gonzagam, Siciliae Proregem, duobus Hiſpanis viris inſignibus comitantibus, noctu Capellium imperatorem adiiſſe, ſecretoque illi aperuiſſe, Nicopolitanis ſucceſſibus Auriam in ſumma turbatione, ac mœrore verſari, lachrimabundum iis, quæ geſta fuerant, indoluiſſe; cum per ſe ſteriſſe diceret, quin de hoſtibus victoria reportaretur: quocirca denuo Turcas adoriri decreviſſe; neque quidquam, ut illos profligaret, prætermiſſurum. His Gonzaga adjecit, Auriae ſententiam minime ſibi probari: quod, ut antea ſummo ardore pugnam poſcentes, ac victoriæ ſpe cuncti erecti perſpiciebantur; ita, re perperam geſta, remiſſus impetus eſſet, & inſolitus quidam timor animos affeciſſet, ut, iterum pugna cum hoſte conſerta, de univerſa chriſtiana republica periclitandum foret. Quapropter alia moliri, ac tentare oportere, quibus improſperi ad finem Ambracium ſucceſſus compenſarentur.

His de rebus cum nuntii Venetias perveniſſent, dolor, atque indignatio civitatem univerſam tenuit, poſt iſtum tanto labore foedus; poſt tot inſtructas acies, immenſos prope effuſos ſumptus, pulcherrimam obterendi acerrimi hoſtis occaſionem amiſſam fuiſſe. Augebant publicam iram, ac mœrorem privatae literæ, quibus ſingillatim geſta enarrabantur, atque Auria acerrime proſcindebatur, quod in certamen deſcendere, ac manum cum hoſte conſerere noluiſſet. Verum Patres intimos affectus premere conſueti, ne inſenſum ſibi Auriam redderent, penes quem ſummum foederatorum claffis imperium erat, prudenti diſſimulatione uſi, ad illum Senatus decreto literas dedere, quibus quæcumque ab eo geſta eſſent, a magno, ac prudenti imperatore, qui omnia conſilia ad incolumitatem, ac decus chriſtianæ reipublicæ contuliſſet, proſecta arbitrari ſe diceret.

*Senatus li-
tere ad An-
dreadm Au-
riam.*